



Broj: 05/1-50-13-26-35-8/17
Sarajevo, 28.8.2017.

IZVJEŠTAJ

sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Granične policije BiH

Sastanak je održan 26.7.2017., s početkom u 13 sati, u prostorijama Granične policije BiH u Sarajevu. Prisustvovali su: Zoran Galić, direktor Granične policije BiH, Zijad Srabović, zamjenik direktora Granične policije BiH, Mate Miletić, Adisa Begić i Ljubomir Kuravica, članovi Nezavisnog odbora, te Ivana Lovrić, sekretar Nezavisnog odbora.

Direktor Granične policije BiH Zoran Galić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Mate Miletić, član Nezavisnog odbora, ukratko je obrazložio razlog posjete. Rekao je da je posjeta organizirana u skladu s dogovorom sa zadnje sjednice Nezavisnog odbora, ali i u skladu s Planom i programom rada Nezavisnog odbora za 2017. godinu, s ciljem održavanja kontinuiteta saradnje s policijskim agencijama iz svoje nadležnosti.

Direktor Granične policije BiH je na početku razgovora istakao da je 2016. godina u ovoj policijskoj agenciji završena najuspješnijim rezultatima od njenog osnivanja, te da je taj kontinuitet nastavljen i u prvoj polovini 2017. godine. Zapaženi su značajni rezultati po pitanju krijumčarenja osoba, hvatanju i otkrivanju akcizne robe, procesuiranju osoba povezanih s trgovinom narkotika. Posebno je izdvojio i zapažene rezultate na operativnoj akciji koja se odvijala u saradnji s Tužilaštvom BiH i Državnom agencijom za istrage i zaštitu BiH, a riječ je o sprečavanju krađe motornih vozila, posebno u Kantonu Sarajevo.

Također, kad su u pitanju operativne aktivnosti, direktor je naglasio i veoma korektnu međusobnu saradnju s Republikom Hrvatskom gdje, u skladu s potpisanim sporazumima, zajedničkim patrolama kvalitetno nadziru graničnu liniju, te isto tako dobru saradnju s kolegama iz Srbije i Crne Gore.

Kada je riječ o popunjenosti upražnjenih radnih mjesta, Granična policija BiH je do sada objavila dva javna konkursa. Prvi konkurs je bio za 70 policijskih službenika (50 u činu policajac i 20 u činu mlađi inspektor), a drugi za 100 policijskih službenika. Dalje, Vijeće ministara BiH odobrilo je da se u septembru pokrene procedura za prijem još 100 kadeta. Time bi se donekle riješio problem popunjenosti policijskih službenika u ovoj policijskoj agenciji kojih u ovom trenutku nedostaje više od 500.

Rukovodstvo Granične policije BiH upoznao je članove Nezavisnog odbora o nezadovoljstvu Izvještajem Ureda za reviziju institucija BiH koji je za prošlu godinu s izdvojenim mišljenjem. Naime, razlog tome je, između ostalog, i policijski dodatak za koji podzakonske akte treba da donese Vijeće ministara BiH. Isti problem imaju i ostale policijske agencije na nivou BiH.

Dalje u razgovoru direktor je naglasio da ima korektnu saradnju s drugim policijskim agencijama u BiH, ali da bi ona mogla biti još bolja.

Članovi Nezavisnog odbora na kraju su naglasili da će Nezavisni odbor i dalje, u okviru svojih nadležnosti, pružati podršku radu Granične policije BiH i poželjeli im mnogo uspjeha.

Sastanak je završen u 14,30 sati.

**PREDSJEDNICA
NEZAVISNOG ODBORA**

Tatjana Klječanin-Martić